

宋徐鉉東佳書院記

古之學者家有塾黨有庠鄉有序國有學此係乎人者也聖王之處士也就閒燕孟母之教子也擇鄰居元豹隱南山而成文章成連適東海而移情性此係乎地者也然則稽合同異別是與非者地不如人陶鈞氣質漸潤心靈者人不若地學者察此可不有意於其居乎潯陽廬山之陽有陳氏之書院其先蓋自陳宜都王叔明之後曰兼爲秘書少監生京給事中以從子襄爲嗣任鹽官令生灌爲高安縣丞其孫瓌避亂於泉州之仙遊生伯宣注史記行於世昔馬總嘗左遷泉州與伯宣友善總移

南康伯宣因來居廬山遂占籍於德安之太平鄉常樂里合族同處殆至千人室無私財厨無異饌長幼男女以屬會食日出從事不置僕隸夫馬大順中崇爲江州長史乾甯中崇弟勛爲蒲圻令次弟致本縣令能嗣其業如是百數年勛從子衮本州曹掾當我唐烈祖中興之際詔復除而表揭之旌其義也衮以爲族旣庶矣居旣睦矣常禮樂以固之詩書以文之遂於居之左二十里曰東佳因勝據奇是卜是築爲書樓堂廡數百間聚書數千卷割田二十頃以爲遊學之資子弟之秀者弱冠以上皆就學焉自龍紀以降崇之子蛻從子渤族子乘登進士第近

又蔚然有人文出焉曰遜曰範皆隨計矣四方遊學者自是宦
成而名立蓋繼有之於戲文如原粟求焉斯得道猶江海酌焉
滿腹學如不及仁遠乎哉昔北海有邴鄭之風離騷有江山之
助皆此故也門生前進士章谷嘗所肄業筆而見告思爲之碣
會陳氏之令子曰恭自南昌掾入使至都下因來告別援翰以
授之時太歲乙巳十一月十九日